

*Opinion Publico***ENCUANTO E
BUKI DI POESIA**

Como un persona presente na e lanzamiento di e boeki di poesia na Papiamento: "Meimei di shelo y tera", di autor Gwendy Sneek, mi kier a duna un comentario.

Diarazon ultimo, dia 26 di september, "Meimei di shelo y tera" a mira luz di dia.

Gwendy a scohe pa lansa su boeki na un otro manera cu ta di costumber.

Durante e anochi ey e publico presente a mira y scucha Gwendy ta declama su poesianan cu acompañaemento di un grupo di baile y un grupo di musiconan tocando tambor.

Gwendy su obra di poesia ta mescla diferente creencia religioso, cu ta inclui cierto ritual y hende cu ta practica esaki. Esaki yama sincretismo religioso.

E programa tabata consisti di declamacion intercambia cu baile. Ora Gwendy ta declama, hopi di e imagennan di antes ta bin ariba. E ta papia di Maria Leoncia y Negro Felipe. Tambe di e creencianan cu nos tin ora di wak poeshi preto, sende bela, wak carta pa suerte. Bo mester a sigui si cu hopi atencion loke e ta declama, pasobra e contenido di e poesianan ta exige cu bo sa un poco di e costumernan di nos pueblo.

Na Aruba tin hopi mescla di diferente cultura, religion y rasa, locual ta trece cune cu nan ta influencia otro. Gwendy a duna nos un sabor di e influencia aki.

E anochi a cuminsa cu palabranan di Joyce Pereira. E coreografia di e bailenan tabata di Alydia Wever. Entre e bailarinnan tabata tin tambe e ruman muher di Alydia, Pierangeli Wever, y Diantha Maduro. Ambos bailarin a caba di gradua na Hulanda como docente di baile.

Locual a capta hopi interes, tabata e 'schimmenspiel', un presentacion tras di un telon blanco. Y e actris tras di e telon: Joan Danies. Den un di e sketchnan bo ta mira e mirador di suerte ta huma su siga y invoca e misterionan pa juda wak bon suerte.

E grupo di musico, Sonfaya, tabata bao guia di Mo Mohammed. E madrina y e padrino di e boeki ta señora Rafi Elizabeth y Su Exelencia Sr. Ramon Lee, Minister di Cultura, Labor y Deporte. Nan a batisa e boeki cu 'coecoei'. Por cierto no tabata conoci ken lo ta e madrina y e padrino, tabata un sorpresa ora nan a subi e podium.

Despues di e presentacion aki, tur presente por a disfruta di un brindis cu 'coecoei' den e foyer. Tabata vale la pena pa mira un sincretismo tambe den arte: literatura, baile y musica hunto. Gwendy, bo a logra mescla, uni of con bo kier yame, un fusion di no solamente diferente creencia religioso, sino tambe di cultura, den Cas di Cultura.

Nos aki na Aruba, ta purba usa tur locual ta bon di tur creencia of religion pa nos bay dilanti. Abo a mostra nos un tiki di dje. Sigui asina.

Un espectador